

Enam protege UMP tamat Program Felo Perdana dirai



ABDUL AZIZ Abdul Rahman (tengah) dan Yuserrie Zainuddin (lapan dari kiri) bersama enam protege UMP berjaya menamatkan program perintis Felo Perdana UMP.

Oleh MOHAMAD SHOFI MAT ISA , 4 April 2023, 2:28 pm

KUANTAN: Seramai enam protege Universiti Malaysia Pahang (UMP) berjaya menamatkan program Felo Perdana Protege UMP setelah enam bulan berkhidmat kepada pengurusan universiti tersebut termasuk Pengerusi Lembaga Pengarahnya, Tan Sri Dr. Abdul Aziz Abdul Rahman dan Naib Canselor, Profesor Datuk Dr. Yuserrie Zainuddin.

Abdul Aziz berkata, protege terbabit berjaya didedahkan dengan aspek kepimpinan dalam universiti bukan sahaja membabitkan operasi seharian malah bagi membentuk pemikiran sebagai pemimpin untuk membuat keputusan di peringkat tertinggi.

“Kemahiran insaniah mereka selama enam bulan ini bukan sahaja di UMP malah didedahkan dalam organisasi korporat termasuk di UMW Holdings dan Perodua bagi melahirkan protege sebenar,” katanya dalam kenyataan di sini hari ini.

Abdul Aziz berkata, menerusi kejayaan itu, Program Felo Perdana UMP 2.0 bakal menyusul dengan menawarkan peluang buat alumni menyertai program ini bagi melahirkan lebih ramai protege pada masa depan.

“Program Felo Perdana UMP 2.0 bakal mengemas kini dan menambah baik modul seiring dengan perkembangan organisasi yang memerlukan pemimpin berfikiran strategik yang boleh membantu pemimpin organisasi membuat keputusan secara tuntas dan berkesan,” katanya.

Protege ini terdiri daripada Nur Ainaa Adhreena Muhamad Shukri yang ditempatkan di Pejabat Naib Canselor (PNC), Muhammad Syamim Mazlan ditempatkan di Pejabat Timbalan Naib Canselor (Penyelidikan dan Inovasi) dan Muhammad Aizat Azed di Pejabat Timbalan Naib Canselor (Hal Ehwal Pelajar dan Alumni).

Muhammad Aminuddin Rosnizan ditempatkan di Jabatan Pendaftar, Nurul Shuhada Haji Mohamed ditempatkan di Institut Tamadun dan Kajian Strategik (ITKAS) dan Muhammad Nur Aqmal Nazri di Jabatan Bendahari.

Program Protege UMP ditawarkan kepada graduan UMP bagi memberi peluang kepada alumninya menimba pengalaman bertugas dan bekerja sebagai Pegawai Ikhtisas kepada Pengurusan UMP selama enam bulan. – UTUSAN